



STINAPA TA INFORMA

KORAL, E BLÒKINAN DI KONSTRUKSHON DI NOS EKONOMIA

Ántes koralnan tabata blòki di konstrukshon di bèrdat. Koral ta animal chikitu ku ta traha su eskeleta di kalki. Den transkurso di míles di siglo esaki a kondusí na formashon di lag diki di piedra di kalki, loke nos ta yama kleps. Ántes tabata usa pidi pareu di kleps pa traha muraya di kas. Awendia ta traha 'steenslag' dor di mula kleps den 'steenbrekerij', pa usa den konstrukshon pa traha blòki, den betòn i pa dòrna kurá. Den pasado tabata kima piedra di kalki den fòrnu di kalki. Asina tabata haña kalki ku tabata brua ku awa i santu pa traha un semènt pa traha kas i pa hasi murayanan blanku. Un otro produkto ku tabata usa di e refnan ántes ta e 'black coral'. Tabatin un tempu ku tabata na moda pa traha prenda kuné. Den e kaso aki no ta un koral ku ta traha kalki pero un 'koral moli' ku parse un mata bou di awa. Komo resultado di e popularidat aki no tin hopi lugá ku 'black coral' mas. Koralnan bibu, nos refnan, ta hopi importante pa nos i nos ekonomia. Pa kuminsá nan ta forma un barera kontra olanan grandi. Den otro parti di mundu tambe nan tabata kima kalki. Ora e kalki riba tera a kaba, nan a kuminsá saka koral bibu for di laman pa seka i kima, destruyendo pida grandi di refnan. Kostanan kaminda a kita e refnan ta hopi mas débil ora tin tormenta. Esaki a keda demostrá durante e tsunami grandi di dos aña pasá. E refnan di Boneiru ta ser kalifiká komo esnan mas bunita di Karibe. Esaki no ta un kasualidat; nos tin e refnan ku ta mihó protehá desde 1979 ora a lanta Bonaire National Marine Park. Industria di buseo ta un fuente di entrada importante pa Boneiru. For di trempan nan a realisá ku sambuyamentu no por tuma lugá sin regla. E refnan ta muchu delikado pa esei. Asina a pone bui pa mara boto i yate i a prohibí ankramentu. Tambe a pone regla ku sambuyadó no tin mag di saka nada for di awa, ni bibu ni morto, i no tin mag di mishi ku e koral. Awendia kasi 30.000 turista ta bishitá Boneiru pa sambuyá i esaki ta duna trabou na hopi hende.

Skirbí pa Sabine Engel, tradusí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURELESA



Traha huntu na un desaroyo duradero pa Boneiru